

- 1296 aliquanto etiam minore navium numero congressi, Genuensium vires pene in perpetuum fregere. Nec illud exciderat, quotiens eo bello Genuensis (qui tanto strepitu tum pugnam cieret) Venetorum occursum turpi fuga declinasset: aperte prædicare, hostes non suarum virium fiducia, aut quia Venetam virtutem ignorarent, id facere, sed per tinacia quadam genti innata, quæ per æqua & iniqua eam præcipitem ageret: certo scire se, Ligusticam terram non tam cito diversum genus hominum tulisse ab iis, quos paucis ante annis totiens fugassent, ac pene ad internecionem non una strage perduxissent. Contra Ligur indigne ferre, quod nonnunquam primo Ligustico bello Venetis cessisse videretur: cæterum stimulabat recens dolor injuriæ in Ponto biennio acceptæ. Sed nihil erat, quod eos ferociores redderet, quam quod per id tempus Pisanorum opes ita fregerant, ut nihil tam potenti nuper populo, præter antiqui nominis umbram, reliquissent. His utrinque animis ac fiducia concursum. Præerant Venetæ classi Carolus & Andreas Danduli, viri impigri: hi, nulla re, quæ ad victoriam pertineret, prætermissa, venientem hostem ferociter excipiunt, exceptum magno animo sustinent. Anceps oritur pugna, cædesque teterrima, qualem in tam validarum classium occursum oriri oportuit. Horrendæ voces & clamor nautarum ac militum sese hortantium exaudiri: strepebant omnia collisarum navium conflictu. Pugna cum multa cæde aliquandiu distracta: demum, fuscis Venetis, fœdissima oritur strages: instare victor Ligur, omnia cædis ac ruinæ complere. Venetarum rerum scriptores, præter unum, reliqui omnes fatentur atrocissimam eladem ea pugna acceptam, profligatamque ac prorsus deperditam classem: sed amissarum navium numerum quasi consulto supprimunt; ut merito suspicari possis, ex tanta classe, aut navim nullam, quod incredibile est, aut quam paucissimas evasisse. Unus, ut dixi, omnium rem aliquanto prolixius tradidit. Ait ille, quod omnino ab aliis diversum est, Genuenses in Corcyrensi portu a Venetis obsessos voluisse naves omnes Dandulis tradere, si incolumes inde viros abire

1298
*Veneri ad
 Corcyram
 nigram vi-
 ctis ingen-
 tem eladem
 accipere.*